

## UMP, UTM Anjur Pertandingan 3 Minutes Thesis 2015



Kuala Lumpur, 12 Mei – Institut Pengajian Siswazah Universiti Malaysia Pahang (UMP) melalui bersama Sekolah Pengajian Siswazah (SPS), Universiti Teknologi Malaysia (UTM) menganjurkan pertandingan “Malaysia 3 Minutes Thesis (3MT)” yang berlangsung di Anjung Menara Razak, Kampus Bandar UTM Kuala Lumpur baru-baru ini.

Pertandingan merupakan program kerjasama Kementerian Pendidikan Malaysia (KPM) dengan Majlis Dekan-dekan Pengajian Siswazah (MDPS) university awam dan institusi pengajian tinggi swasta. Penganjuran program bertujuan untuk meningkatkan kemahiran berkomunikasi di kalangan para pelajar siswazah dalam pengajian peringkat kedoktoran (PhD) menerusi pembentangan projek penyelidikan yang sedang dijalankan dalam tempoh singkat dengan gaya penyampaian yang mudah difahami. Seramai 69 orang pelajar siswazah bertanding dalam pelbagai bidang pengajian iaitu bidang Kejuruteraan, Sains & Teknologi serta Sains Sosial.

Pertandingan ini telah dirasmikan oleh Timbalan Menteri Pendidikan II, YB. P. Kamalanathan A/K P. Panchanathan yang dihadiri sama Naib Canselor UMP, Profesor Dato’ Dr Daing Nasir Ibrahim dan Timbalan Naib Canselor (Akademik & Antarabangsa) UTM, Profesor Dr Rose Alinda Alias.



Dalam ucapan, Dato' Dr Daing Nasir berkata, pertandingan ini merupakan satu bentuk latihan akademik yang baik yang dapat membangunkan kemahiran akademik, kemahiran pembentangan dan komunikasi penyelidikan serta pada masa yang sama, menyokong kepada pembangunan keupayaan pelajar dalam penyelidikan, terutamanya dalam menjelaskan perspektif akademik mereka dengan cara yang lebih santai dengan gaya bahasa yang sesuai kepada bukan penonton yang berminat untuk mengetahui lebih lanjut mengenai penyelidikan itu.

"Ianya juga satu usaha mengenalpasti bakat dan kesediaan para pelajar siswazah UMP untuk bersaing ke peringkat antarabangsa dengan mengetengahkan hasil kajian penyelidikan yang dijalankan mereka demi manfaat semua. Selain itu pertandingan ini merupakan satu strategi penjenamaan universiti ke peringkat antarabangsa secara tidak langsung," katanya.

Sementara itu, Dekan IPS, Profesor Dr. Abdullah Embong berkata, pertandingan ini sememangnya merupakan satu inisiatif MDPS amnya dan IPS khususnya dalam memupuk budaya kreativiti dan memasyarakatkan hasil penyelidikan untuk dikongsikan dengan masyarakat umum selain meningkatkan motivasi dan kemahiran berkomunikasi para pelajar. Beliau yang hadir mewakili Naib Canselor UMP pada sebelah petangnya menyampaikan hadiah dan cenderahati kepada pemenang mengharapkan agar aktiviti seperti ini dapat dijayakan dengan lebih baik oleh UMP pada masa hadapan.

Manakala bagi Timbalan Dekan IPS yang bertindak selaku pengarah bersama penganjuran 3MT UTM-UMP, Profesor Madya Ir. Dr. Ahmad Ziad Sulaiman, pertandingan ini merupakan aktiviti yang dirancang awal oleh MDPS dan bagi IPS UMP ianya adalah di bawah KPI pembangunan profesional pelajar. Katanya, ianya sebagai usaha pihaknya dalam mengenalpasti bakat dan kesediaan pelajar siswazah UMP untuk bersaing ke peringkat global yang mana seorang peserta terbaik dalam kalangan enam orang wakil UMP akan dihantar menyertai "Trans-Tasman 3-Minutes Thesis Competition" yang akan berlangsung di University of Queensland, Brisbane Australia yang akan diadakan pada 2 Oktober 2015 nanti. Selain itu pertandingan ini merupakan satu strategi penjenamaan universiti ke peringkat antarabangsa secara tidak langsung.

Pemilihan pelajar ini adalah dalam kalangan mereka yang merupakan peserta terbaik yang terpilih melalui pertandingan 3MT peringkat UMP yang diadakan di UMP pada 27 April 2015 baru-baru ini. Majlis menyaksikan pertandingan dimenangi keseluruhannya daripada UTM. Bagi penganjuran kali ini, UTM telah dipilih sebagai penganjur utama pertandingan manakala UMP bertindak sebagai penganjur bersama. Pemilihan gabungan kerjasama UTM-UMP ini adalah keputusan sebulat suara pihak MDPS dan penganjur bersama yang dipilih akan menjadi penganjur utama bagi pertandingan 3MT pada tahun pada tahun 2016. Bagi penganjuran tahun hadapan, MDPS telah sebulat suara memilih Universiti Utara Malaysia (UUM) sebagai penganjur bersama bagi Pertandingan 3MT 2016.



**Berita disediakan oleh Profesor Madya Ir. Dr. Ahmad Ziad Sulaiman dari Institut Pengajian Siswazah.**

Posted By : SITI SARAH BINTI MOHAMAD RAJIMI Date Posted : 18-05-2015, 16:36:30